



e-bilten

OPĆINA TEŠANJ
www.opcina-tesanj.ba
e-mail: optesanj@bih.net.ba

Ponedjeljak 01.11.2010

Broj 42

Aktuelnosti

1. Poklon je poklon je...
2. Fućkaš zemlju koja Bosne nema
3. Osiguravajuća društva

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu:

fuad.sisic@opcina-tesanj.ba

Molimo vas da ovaj elektronski bilten prosljedite svim zainteresiranim u našoj općini.

Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću. Sa zadovoljstvom očekujem vaše komentare, sugestije i primjedbe.

Molim da ne prinatate ovaj sadržaj. Za svaki nepotrebno odštampan papir mora se bez potrebe oboriti drvo koje raste!



POKLON JE POKLON JE...

Trebali gledati poklonu u "zube"?

Rekli su davno da nema teških pitanja, ali postoje teški odgovori, dileme, neslaganja oko odgovora ili stajališta. Možda je bolje kazati postoje različita gledišta i stajališta na ista pitanja pa stoga odgovori postaju teški. Ovih dana sam se našao u takvoj situaciji pa sam putem maila postavio jedno pitanje slučajnim odabirom jednog broja mail adresa i dobio dosta odgovora, sličnih i različitih. A u suštini dilema samog odgovora je sljedeća: kada nekome dajete poklon, da li pri tome vodite računa o onome kome poklon dajete, ili vodite računa o sebi? Da li želite nekoga obradovati poklonom, ili želite nekome pomoći jer mu je pomoć potrebna, ili to radite u ime Boga, ili pri tome ostvariti neki svoj, sebični, prikriveni cilj, ili možda sve zajedno pomalo? Da li očekujete kada dajete nešto zauzvrat, da nešto i dobijete.

Odgovor na individualnoj ravni bi mogao biti, pod pretpostavkom pune iskrenosti, bez sumnje veoma različit, a ako bi bio grupisan možda bismo dobili snažne i različite grupe. Ali društveni odgovor na to pitanje postoji kroz usvojene konvencije, usvojene zakone kao standard organiziranog društvenog ponašanja bilo da se radilo o vladinom ili nevladinom sektoru. I umjesto da odgovorni ljudi koji se nalaze na čelu organizacija preuzmu odgovornost kroz primjenu društvenih normi ponašanja, oni pribjegavaju ličnim kalkulacijama, osobnim mišljenjima i ne doprinose izgradnji civiliziranog društva. Sve skupa se to manifestuje u javnosti kao banalna priča o tome kako Općina ili neko tamo ne dopušta da se dijele dječiji paketići, da nekome sada smeta sve a kada je neko slao pomoć nije smetalo ništa, i tako mnogo besmislenih optužbi i priča.

Možda karakter i dostojanstvo nekih naših ljudi nije na visokom nivou, ljudi su proživjeli mnoge godine teških okolnosti, treba im vremena za oporavak, ali odgovornost rukovodstva je nužna.



"FUČKAŠ ZEMLJU KOJA BOSNE NEMA"

LATINICA, je li Denis Latin odustao od BiH?

Poznata LATINICA urednika Denisa Latina na hrvatskoj državnoj televiziji, 25.10.2010. godine, tematski je analizirala i stanje u Bosni i Hercegovini. Iako sam uspio gledati samo jedan dio te emisije, zaista me duboko zabrinulo. Prilog koji je o stanju u BiH prikazan u ovoj emisiji, ukratko:

Bakir Hadžiomerović: Stanje u BiH posljednje četiri godine katastrofalno. Izbori donijele značajne promjene i očekuje sada institucionalni oporavak. (pitam se koje promjene: Dodik ostao, Čović ostao, SDP preuzeo ulogu SDA, SDA preuzela ulogu SBiH>>> to praktično znači da su Bošnjaci bili problem, jesu li!???)

Zdravko Grebo: intelektualno nadimanje, ništa ne valja, niko ne zna, stoga svi su krivi.

Ostali sudionici priloga: nevladin sektor, književnici, standardno >>> dvije škole pod istim krovom, segregacija djece, torovi unutar BiH, stoga svi su isti.

Željko Kopanja: nakon izbora nije se dogodilo ništa bolje ali nije ni ništa gore, u cjelini je ok.

Privrednik hrvatske nacionalnosti iz Banja Luke: U Banja Luci ima uslove za privređivanja kao i svaki srbin, možda mu je čak i lakše.

Milorad Dodik: samo je RS održiva, nije ni BiH ni FBiH, nudi Hrvatim treći entitet unutar FBiH

Ako znamo da LATINICA spada u područje objektivnog istraživačkog novinarstva, i da će biti ozbiljno shvaćen u krugovima koji prate stanje u BiH, ovaj prilog je po BiH bio veoma loš. Poruka koja je poslana mnogo je bliža konstataciji da BiH nema šansu, nego da ima kao i to da je mnogo bliže istini da su "sve strane" u BiH isto krive nego da nisu.

I dok se bh političari (Željko Komšić, Sulejman Tihić, Zlatko Lagumdžija) susreću intenzivno sa Dr. Ivom Josipović, Predsjednikom Hrvatske u isto vrijeme kardinal Vinko Puljić se susreće sa g-đom Jadrankom Kosor, Premijerkom Vlade Hrvatske.

Ne znam da li je, ali se trebalo putem kabineta Predsjedavajućeg Predsjedništva BiH Željka Komšića u vezi sa ovom emisijom oglasiti. Ako ništa drugo, ono radi same istine makar nikome drugome do toga više izgleda nije stalo, osim onome kome je stalo i do same Bosne i Hercegovine.





NADLEŽNOST, OVLAŠTENJE, ODGOVORNOST

Je li moguće u javnim poslovima biti odgovoran?

Organizaciju, prosto kazano, čine dvije ili više osoba koje rade zajedno da bi nešto postigli, što inače sami pojedinačno ne bi uspjeli. Te osobe treba da dijele zajedničku viziju, misiju i vrijednosti ali svaka osoba realizira svoje odgovornosti na temelju nadležnosti i ovlaštenja koja proizilaze iz utvrđenih organizacijskih pravila.

U javnim poslovima, Općina kao lokalna uprava predstavlja oblik organizacije koja ima svoju strukturu proisteklu iz ustava i zakona (Općinsko vijeće, Općinski načelnik), utvrđene obaveze na nivou lokalne samouprave – općine, i strukturu koja dalje sama razvij (mz-e, javne ustanove, javna preduzeća,..) prema svojim lokalnim potrebama da bi ispunila misiju i viziju. Dakle, dalje se razvija struktura i utvrđuju pravila (propisi) na temelju prethodnog od strane općinskog vijeća i/ili općinskog načelnika, ovisno o nadležnostima i ovlaštenjima. Temeljni lokalni općinski propis je statut utemeljen na ustavu i zakonima, ali proširen nad konkretnom strukturom u konkretnoj općini.

U savremenom svijetu, menadžment kao novi oblik profesije u uspješnoj realizaciji upravljanja organizacijama, gotovo kao standard nameće posvećenost i odgovornost najvišeg rukovodstva a zatim ljudske resurse kao nužna znanja, kompetencije i vještine unutar organizacijske strukture kako bi organizacija bila uspješna. Pri tome, rukovodstvo kompetencije ne osporava, ono ih motiviše i kada postavlja pitanja u vezi sa nejasnim stvarima. Najviše rukovodstvo zahtjeva odgovornost u okviru nadležnosti i ovlaštenja i osigurava potrebne resurse, a ne osporava ih. Najviše rukovodstvo nikada ne podržava interes jednog dijela organizacije na račun cjeline, ili na direktnu štetu drugog dijela organizacije.

U slučaju Općine Tešanj, na žalost ne samo u našem slučaju, neke teme na nivou najvišeg rukovodstva (Općinsko vijeće i Općinski načelnik) urušavaju organizaciju – Općinu u korist nekih pojedinačnih dijelova njene strukture (pojedinih mjesnih zajednica, pojedinačnog interesa neke stranke, čak nekog pojedinca), zbog nedostatka znanja, zbog nepriznavanja kompetencija drugih, zbog



ulaska u nadležnosti i ovlaštenja drugih ali ne i preuzimanje odgovornosti, zbog nove "mudrosti" koja ne štiti principe i zakone nego onima koji kuću ruše prave ustupke da bi ih se malo umirilo, da im se ne bi i osobno zamjerilo, jer uvijek postoje neki lični interesi a oni su, uglavnom, ispred općih, ispred principa i zakona osim kada su sami inadi u pitanju. U konačnom zbog samog uzroka većine nabrojanog: nekompetentnosti samog rukovodstva.

OSIGURAVAJUĆA DRUŠTVA

Konkurencija nije donijela prednost korisniku usluga?!

Konkurencija čini čuda u razvijenim tržišnim odnosima i uređenim pravnim sistemima. Kako Bosna i Hercegovina prolazi tešku tranziciju: političku, tržišnu i rekao bih višenacionalno uravnoteženje, taj put je spor i dug. Suštinski rezultat zdravih konkurentskih odnosa je korist za kupca/korisnika usluga, jer prodavati proizvod/uslugu znači imati kupce/korisnike usluga koji plaćaju to što im je potrebno, a jedino taj novac istovremeno osigurava opstanak i razvoj biznisa.

Kakvu korist imaju kupci/korisnici usluga osiguravajućih društava? Prilikom registracije osobnog automobila, kao i svi koji to čine, obavezan sam bio platiti osiguranje iz poznatih razloga. Pri tome, papir koji sam dobio mi ne bi značio baš ništa ako ne bi bilo provjere od strane policije, ili kada ne bi bilo saobraćajne nesreće, kada je taj papir potreban policiji radi administriranja. Suština je u tome kakvu uslugu dobijam od osiguravajućeg društva u slučaju kada mi usluga koju sam platio zaista postane potrebna, kada ona dobiva za mene kao kupca upotrebnu vrijednost?

Na žalost, usluga je loša, neprimjerena i u ovakvim uslovima kakvi su bosanskohercegovački! Ili su možda moja očekivanja prevelika? Prvo, treba čekati nekoliko dana (moje iskustvo, sedam dana) da dođe neko da uslika auto, jer bez tog fotografisanja ne možete dalje. Drugo, morate otići u servis i platiti račun, a onda čekati da vam osiguravajuće društvo to refundira na vaš račun. Koliko ćete čekati, ne znam, upravo mi slijedi čekanje. Uz to vas uposlenik osiguravajućeg društva savjetuje da kupite polovan rezervni dio, jer je sigurnije, jer servis ugrađuje nove ali "loše kineske dijelove". Sve to pod uslovom da niste krivi, da niste izazvali udes. Ne znam šta se dogodi još ako ste krivi!

Ono što sada znam je to da sigurno neću više osigurati auto kod sadašnjeg osiguravajućeg društva, promijeniti ću, makar me čekala ista stvar ako bude zatrebalo. Možda ću proći kao i birači na izborima, ali makar ću kazati novom osiguravajućem društvu zbog čega sam to uradio i šta očekujem. Ko zna, možda se posreći, a molim Boga da mi ne bude potrebno.

**ISKRENE ČESTITKE
VJERNICIMA KOJI SU
ODLUČILI OVE GODINE
OBAVITI HADŽ!**



PRED ĆATIĆEVIM MEZAROM

*Isti je nišan nad nama
samo je tvoj bolji svijet*

Amir Brka

Općinski načelnik
Fuad Šišić

